

REGIONAL NEWS

BAIRABI – SAIRANG RAILWAY LINE

Northeast Frontier Railway Chief Public Relation Officer Kishore Sharma chuan Bairabi atanga Sairang pawh Rel kawng siam hna chu za a za zawh fel a ni tawh a ti a, a him dan enfiah mek niin July thla atanga service tura ruahman a ni tih a sawi.

Akashvani palai nen an inkawmna ah he thu hi sawiin NF Railway CPRO Kishore Sharma chuan Sairang thleng tura Rel kawng siam mek chu nilaini khan Rel tlantir chhin ani a ti a, hlawhtling takin a tlan tih sawiin Rel chuan kilometre 51 chuang a zawh a ti a, nimin khan Rel tlan nawn tir leh anih tih a sawi bawk.

Ram zalen hnua a vawi khatna atan Aizawl dai, Sairang thleng tura Rel kawng siam hi Sorkar laipui hmalakna pawimawh, Act East Policy tihhlawhtlinna pakhat niin, inkalpawhna tha leh tlawm bakah sum leh pai dinhmu tihhmasawnnana hmarchhak state te thlunzawm chu a tum ber a ni a, he rel kawngah hian Station pali: Hortoki, Kawnpui, Mualkhang, leh Sairang-Sihhmui Station awm tura ruahman niin, leiverh 32, lei lian 55 leh lei te deuh 89 a awm dawn a ni.

Chief Minister Pu Lalduhoma’n vawiin khan North Eastern Railway General Manager Pu AK Chaudhary kawmin Bairabi rel station tihchangtlunna hna leh Mualkhang station kalpawhna tur kawng bakah Sairang station hna kal mek leh hmalakna dang a sawi pui a, Pu AK Chaudhary chuan kumin June thla laihawlah Commission of Railway Safety Inspection neih a nih dawn bakah June ni 17 hnu lamah chuan hawn theiha an in peihfel hman an beisei thu a sawi a ni.



LADC CEM

Larsap Gen (Rtd) Vijay Kumar Singh chuan Lai Autonomous District Council CEM atan BJP MDC Pu N. Zangura a ruat.

Larsap in CEM atana Pu N. Zangura a ruatna thuchhuah tarlan danin BJP MDC hian CEM atana thawptu a ngah tawk leh tawk loh finfiahna a paltlang a ngai dawn a, a paltlang anih chuan tun term chhunga LADC CEM palina tur a ni dawn a ni.

LADC inthlan hnuhnung ber kum 2020 December thla khan MNF in hneh takin sawrkarna siamin Pu Manghmuna Chinzah chu CEM a ni a, hemi hnuah MNF sawrkarah tho CEM nilai chu Pu V. Zirsanga’n thlakin CEM a ni a, nikum 2024 khan MNF MDC engemaw zatin an chhuahsan avangin MNF leh Congress Party ten sawrkar intawm siam a ngai a, Congress MDC awmchhun C. Lalmuanthanga chu CEM a ni leh a, MNF leh Congress sawrkar intawm kumin kum tira a tluk hniah February ni 27 khan ZPM khaihhruai sawrkar piang lehin MNF sawrkara CEM lo ni tawh Pu V. Zirsanga chu CEM atan lak luh leh a ni.

Tunah hian MNF leh BJP intawm in sawrkarna siam tumin Congress MDC pawhin an thlawp dawn a, CEM atana ruat Pu N. Zangura hi ZPM atanga BJP zawm a ni.

Mizoram BJP President Pu Vanlalthmuaka chuan BJP kaihhruai sawrkar LADC a piang dawn a ti a, thlawptu an hmu tha tawk tih sawiin Pu N. Zangura chuan MDC 13 thlawptu a hmu a ti a, BJP kaihhruai sawrkar pian tir an duh avangin party dang an thawhpui tih a sawi bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



AMC

Aizawl Municipal Corporation chuan nimin khan thuchhuah siam in Mizoram Legislative Assembly leh a chhehvel - Venghlui Local Council leh Tuikual South Local Council huam chhunga chawhmeh zuar a thu thin te chu thu tawhlo turin an ngen.

AMC chuan dan in thuneihna a pek angin, helai huuam chhung kawngkam a inzawrh phal lohna hmuna puan a lo nih tawh avangin, dan zawma thu tawh lo turin thuchhuah hi an siam a, AMC Municipal Commissioner Pu Joseph H Lalramsanga chuan Venghlui leh Tuikual South huamchhunga thil zuar thin te chu AMC Multi-Complex Tuikual South-ah in sawn vek turin a ngen a. kawng kama thil zawrh phal lohna hmunah thut phal anilo tih sawiin dan palzut te hi cheng sang 5 thleng chawi tir theih annih bakah an thilzawrh man sak theih anni a ti a, mipuite chu phalna hmuna thil zuarte dawr turin an ngen tih an sawi bawk.



ECI

Election Commission of India chuan thuchhuah siamin electoral roll siam kawnga mumal zawka vote thlak anih theih nan ruahmanna thar a siam.

ECI in ruahmanna a siam tharte hi tunlai thiamna hmanga voter ID nei tura inziah luh dan awlsam zawk te niin Voters te tan samkhai zawka Voter Information Slip an hman tangkai theih zawk nan VIS design siam that te a ni a, Voters te serial number leh part number chu hmuh awlsam zawk nan chiang taka tarlan niin a font size pawh tihlen niin Hei hian voters ten an polling station awlsam zawka an hriat theih nan leh polling officials ten electoral roll- a voters te hming an hmuh zung zung theih phah beisei a ni.

